

ATXILOKETA. Bixente Goikoetxeari ETako zuzendaritzako kide izatea egotzi dio Poliziak

Baionara eraman dituzte Tarbesen atxilotutakoak

Bixente Goikoetxea eta Muriel Lucantisen bi urteko alaba zentro batean ezarri dute

Erredakzioa | BAIONA

Bixente Goikoetxea Barandiaran *Willy* eta haren lagun Muriel Lucantis Baionako polozia etxera eraman zituzten atzo. Biak Tarbes ondoko Bourreac herriko (Okzitania) apartamentu batean atxilotu zituzten larunbat arratsaldean, 18:30ean. Hala ere, igande arratsera arte Frantziako Barne Ministerioak ez zuen atxiloteten berririk eman. Haiekin bi urteko alaba zeukaten, Mayi. Koordinaketak jakinarazi zuen atzo ez zegoela bere gurasoekin. Zentro batera eraman zutela, baina tokiaren berririk ez zutela jakinarazi salatu zuen Koordinaketak.

«Anitz kezkatzen gaitu Mayiren egoerak, ez baitakigu non dagoen ezta nola ere», adierazi zuen Koordinaketak prentsa ohar batean. «Haren familiak berreskuratu nahi luke eta hartaz arduratu». Koordinaketak oroitarazi zuen ez dela halakorik gertatzen den lehen aldia. Josetxo Arizkurenen semea ere berdin gertatu zitzaiola gogora ekarri zuen. «Haurrak presio gisa erabiltzen dituzte».

Asier Oiarzabalen atxiloketa baino bi aste berantago

Polizia iturriek zehaztu zuten operazioa «zabalik» dagoela,

SOLASKIDEA

Goikoetxeari EAJ eta EArekin ETak 1998an izan zituen elkarrizketetan parte hartzea egotzi diote

HAURRA

Goikoetxea eta Lucantisen haurraren familiak bere esku uzteko eskatu du

eta atxiloketa gehiago ez dutela baztertzen. Tarbesko operazioa baino hamabost egun lehenago bertze bortz lagun atxilotu zituzten. ETaren logistikaz arduratzea leporatzen diete. Haien artean zegoen Asier Oiarzabal Txapartegi buruzagitzako usteko kidea. Harekin batera Oihane Errazkin, Maria Dolores Lopez Resina, Alberto Ilundain Iriarte eta Didier Agerre atxilotu zituzten. Duela bi asteoak eta igandekoak sortu berria den Interbentzio eta ikerketa brigadak burutu zituen.

Bixente Goikoetxeari, ordea, ETako zuzendaritza politikoko kide izatea leporatzen diote polizi iturriek. ETak 1998an



Bixente Goikoetxea, laguna eta bion alaba atxilotu zituzten tokia.

EAJ eta EA alderdietako buruzagiekin izan zituen isilpeko elkarrizketetan, Mikel Albizu *Mikel Antza*-rekin batera parte hartu zuela diote aipatu iturriek. Horrez gain, BBCK ETari egin eta 1998ko urriaren 24an eskaini zuen elkarrizketan agertu zen kideetako bat zela uste du Poliziak. Goikoetxeak pistola bat, ordenagailu bat eta ETaren dokumentazioa omen zeuzkan berekin, Poliziak atxilotu zuelarik.

Jadanik kondenatua izan zen Frantzian

Bixente Goikoetxea 1959ko otsailean sortu zen Altsasun. 1984ean Iruñean atxilotu zuten

atentatu batzuetan parte hartzea leporatuz, baina akusazioak ez zuen aurrera egin. 1987an bidean barrikada bat ezartzeagatik sei hilabeteko kartzelara kondenatu zuten. Poliziak dio 1990ean ihes egin zuela haren etxetik. Parisko auzitegiak hiru urteko kartzela zigorra ezarri zion 1995ean, bera sasia zela. Mariano Raxoi Espainiako Barne ministroak adierazi du espainiar justiziak ez duela auzirik Goikoetxearen aurka, baina bai, ordea, aurrekari penal zenbait. Mariano Raxoi ministroak agerraldi bat egin zuen atzo Madrilén atxilotetari buruzko xehetasun batzuk emateko.

ESPAINIAKO BARNE MINISTERIOA

Nazioarteko kolaborazioa txalotu du Mariano Raxoik

Mariano Raxoi Espainiako Barne ministroak «terrorismoaren kontrako nazioarteko kolaborazioa» txalotu zuen atzo. Lankidetzaren horren «garrantzia» azpimarratu zuen, frantses agintarien erabakiak eta Nazio Batuen Erakundeak eta Europako Batasunak hartu dituzten azken ebazpenak aipatuz.

Etzi bilduko da Daniel Vaillant Frantziako Barne ministroarekin, Perpignanén (Ipar Katalunia). Horrez gain, urriaren 16an Europako Batasuneko Justizia ministroen biltzarrea iraganen da Luxenburgon. Bertze topaketa batzuen mentura



Espainiako Barne ministro Mariano Raxoi, atzo eginiko agerraldian.

bada azaroan eta abenduan. «Espero dugu jadanik martxan ezartzen hasiak diren akordio garrantzitsuak behin betiko onartuko direla», esan zuen atzo Espainiako Barne ministroak. Biltzar horiez gain, bihar Italiako Barne ministroarekin bildu beharra da Erroman, eta astelehenean Washingtonen EEBBeko lehendakari ordearekin. «Terrorismoaren kontrako kolaborazioa» aipatu nahi du haiekin ere.

«Terrorismoaren kontrako nazioarteko borroka hiritarrei erakunde terroristak zein negatiboak diren azkarkiago erakusteko» balio duela uste du Mariano Raxoi ministroak. NBEn dituen «bide berriak» goraipatu zituen aitzina segitzeko.

Azken atxilotetaz eta nazioarteko kolaborazioaz gain, «Ertzaintzaren eraginkortasun handia» azpimarratu zuen Mariano Raxoik, kale erasoaren kontrako lana dela eta.

ETA

Aldamar kaleko leherketa gerra zikina izan zela dio ETak

Erredakzioa | DONOSTIA

Joan den abuztuaren 20an Donostiako Aldamar kalean lehertu zen jostailuaren ardura «gerra zikinari» egotzi dio ETak iraileko Zutabe barne bulletinean. Donostiako taberna batean utzitako jostailuzko auto txiki baten barruan zegoen bolboraren leherketak Maritxu Eraunzetamurgil hil zuen eta bere biloba Jokin larri zauritu. «Begi bistakoa da ekintza edozeinen kontra zuzenduta zegoela, bere helburua min egitea eta beldurra eragitea zelako», dio ETak aipatutako bulletinean *Gara* egunkariak atzo argitaratu zuenez.

Abuztuaren 20ko leherketaren ezaugarriak kontuan harturik, «argitu gabeko gerra zikinaren iraganeko gertaerak» gogora ekarri zituela dio ETak, Muskiz eta Artxandán agertu ziren bonbakarterak aipatuz. Donostian gertatutakoaren ardura «Euskal Herriaren zapalkuntzaz baliatzen diren politikari eta haien menpekoe» dela gehitu du. Aipatutako gaiaz gain, ETak munduko askapen prozesuei buruzko lan bat argitaratu du. Euskal kasuan, herri eraikuntzan indarrak biltzeko apustua berretsi du ETak.

JAURLARITZA

Ibarretxe harremanetan da erakundeekin agiria hitzartzeko

Agentziak | GASTEIZ

Juan Jose Ibarretxe lehendakaria harremanetan da Foru Aldundiekin eta Eudel Udalen elkartarekin erakundeen arteko agiria hitzartzeko. Askatasuna, pertsonen segurtasuna eta bizi-eskubidearen aldeko agiria izango da. Agiri honekin lortu nahi dute, besteak beste, erakundeek erantzun bakar bat ematea edozein atentaturen aurrean. Lehendakartzako iturrien arabera, harreman «diskretoak» egiten ari da lehendakaria Foru Aldundiekin eta Eudelekin.